

KOLOSA NE

Paulom dis tcgāya sa

Kolosa ne koe

Téé-cookg'ai sa

Ncēes tcgāya sa kò Kolosa koe hānas kereke sa góá mááèa hāa. Ncēes kereke sa kò Paulom ka tshoa-tshoàè tama, igabas kò Paulom kò xāmse a ko tséém xòèm koe hāna, me kòò tséé-kg'aoan kiam x'áé-dxoom Asia dim Efesom koe guu a tsééa tcg'òó.

Paulo ba kò bóòda q'āa, tshúù-ntcōa di xгаа-xгаа-kg'aoa ne Kolosa dis kerekes koe hāna sa, ncēe kòò khòè ne xгаа-xгаа, tāá nqárian ne gha qámsea máá ka a.

Ncēes gúús cúís tama si i, igaba xu kòò ncēe xu xгаа-xгаа-kg'ao xu máá: khòèan méé i q'āe nqāa-qgai khòòè, naka tc'òoan di x'áè-kg'ámán xaèa kg'ónò, témé.

Paulo ba kò dtcòm-kg'ao ne di tchōàn tseegu di góá, a ncēe xu xгаа-xгаа-kg'ao xu cgoa ntcoeku. A ba a kòò máá: Jeso Kreste ba ko cg'oèa hāa kgoarasean máà ta a, zi ko c'ēe zi xгаа-xгаа-kg'ám zi Krestem koe séèa tcg'òó ta a.

Krestem koem Nqari ba guu a nqóómkg'ai kúrúa hāa, a ba a ko gataga Gam koe ga guu a nqóó ba séèa kábia mááse. Krestem cgoa xg'ae a cúí iian ka cúí ta gha nqóómkg'ai koe kgoarasean úúa hāa.

Gaa koe guus kam ko Paulo ba Krestem koe kg'òè sa ko wèé cáím di kg'òèan koe dùú sa nxàes ka góá. Ncēes tcgāyas Kolosa ne góá mááèa hāa sa Efeso ne góá mááèas hāas tcgāyas cgoa cúí si i.

Tigiko ba kò ncēes tcgāya sa séè a Kolosa koe úú, a ba a kò Onesimom cgoa hāa, qāàm ncēm kò Paulo ba tcgāya sa Filemone ba téé-q'ooa ba koe góá máá ba.

Qaa-qaasa kg'uía ne:

- nqóó ba (1:15-20)
- tc'áró ba (1:18-24)

- ncíís kg'òè sa, k̄abas kg'òè sa

Tcgāyas q'oo koe hàna zi:

- Nqōóm dis kg'òè sa hēé naka Krestem di tsééan hēéthēé e (1–2)

- K̄abas kg'òè sa Krestem koe (3–4)

Nqōóm dis kg'òè sa hēé naka Krestem di tsééan hēéthēé e (1–2)

Tsgámkaguku zi

1 ¹Paulo ra a, Jeso Krestem dir x'àè úú-kg'ao^a ra Nqarim ma tc'ēa khama, a gatá ka qōesem Timoteom cgoa hāa.

²Kolosa koe hàna ne dtcòm-kg'ao ne, gatsam ka qōese ga ne ncēe Krestem koe tcom-tcomsa ne tsam ko *ncēes tcgāya sa* góá máá a ko máá: Nqarim gatá ka Xòòm koe guua hāa cgómkuan hēé naka tòòkuan hēéthēé méé i gatu cgoa hāa, témé.

Paulo ba ko dtcòm-kg'ao ne Kolosa di ne còrèa máá

³Eē tsam kò ko còrèa máá tu u ne tsam ko wèé x'aè ka Nqarim gatá òm X'aigam Jeso Krestem ka Xòò ba qāè-tcaoa máá, ⁴⁻⁵*Nqarim koe* tu nqòðan úúa hāa, a gaa domka Jeso Krestem koe dtcòmaa, a gataga wèé ne tcom-tcomsa ne ncàmà hāa sa tsam kómá hāa khama. Ncēe nqòðan tu nqarikg'ai koe tòóa máàèa hāa. Nxāakamaga tu gaa nqòðan ka kómá hāa, tseeguan di qāè tchòàn tu kòò xgaa-xgaaè ka. ⁶Eē i ko qāè tchòàn gatu koe hààm cárn ka tu kò kóm m a tu a kò *tshoa-tshoa a* Nqarim di cgómkuan tseeguan kaga gatu ka q'ana hāa. Ncēe i ko ma wèém nqōóm koe tc'áróan kúrú a kai khama i ko gataga gatu xg'aeku koe hēé. ⁷Epaferasem koe tu kò xgaa-xgaase e, qām sixae ka c'ēem ncàm-ncamsa ba, ncēe gatu domka tcom-tcomsam tséé-kg'aom Krestem di ba. ⁸Ncēe kò gataga *Tcom-tcomsam* Tc'ēem ka tu máàèa hāa ncàmkuan ka bìrí xae e ba.

⁹Ncēes gúús domka xae kò táá chòò cgoa còrèa máá tu ne, gaam cárn ēe xae kò kóm m ka, xae kò Nqari ba dtcàrà Me kúrú tu u, Gam ko tc'ēe sa tu gha cg'òèase q'āa ka, nakam gha Tcom-tcomsam Tc'ēem ka hēéthēé cg'òè-cg'òe tu u, ncēe gha kúrú tu u tu wèé za ga tc'ēega, a kómá q'āa ba. ¹⁰Nxāasega tu gha X'aiga ba kg'anoa hāas kg'òè sa kg'òè, a wèé za ga qāè-tcaokagu Me, a tu a gha qāè zi tséé zi wèé zi koe tc'áróan kúrú, a Nqari ba q'āan koe càùse ka. ¹¹*A xae a ko còrè*, wèé qarian cgoa tu gha qari-qariè sa, Gam di qarian x'áàm di koe guua ka, qóman xg'aeku koe tu ko qarika téé a tu a qád tcáo, qāè-tcaoan cgoa. ¹²*Xae ko còrè*, Abo ba

a 1:1 x'àè úú-kg'ao - Gerika sa ko “apostolo” témé.

tu gha qãè-tcoa máá sa, Gaam nc̄ee kúrú tua tu kg'ano-kg'anosa ii ba, ãe tcom-tcomsa ne q'õda hãa sa tu ko gataga th̄ee q'õd sa, nc̄ee x'aàn **di x'aian** koe hãa sa. ¹³Ntcùúan di qarian koem kgoara tcg'òd taa, a ãem ncàma hãam Cóm di x'aian koe tséa óa taa hãa, ¹⁴nc̄ee Gam koe ta qgoarakuan úúa hãa ba, chibia ta di qgóóa-máákuan di i.

Krestem díi ii sa h̄ee naka dùu sam kúrú máá taa sa h̄éth̄e e

¹⁵Bóðse tamam Nqarim dis ii sam úúa^b, w̄eé zi gúú zi ka tc'amaka hãas téé-q'oo sa úúa hãa^c ba. ¹⁶W̄eé zi gúú zia Gam koe guu a kúrúea khama, nqarikg'ai koe hãna zi h̄ee naka nqóókg'ai di zi h̄éth̄e e, hòðse ko zi h̄ee naka hòðse tama zi h̄éth̄e e, x'aian di ntcóo-q'ooan h̄ee kana tc̄eè-tcuì-kg'aoan h̄ee kana tc'ãa-cookg'ai-kg'aoan h̄ee kana qarian h̄éth̄e; w̄eé zi gúú zia Gam koe guu a kúrúea, a Gabá kúrú mááea. ¹⁷W̄eé zi gúú zi cookg'ai koem hãna, zi ko w̄eé zi gúú zi Gam koe qgóóa xg'aese. ¹⁸Me Tcúú Me e tc'áróm di ba, nc̄ee kereke ii ba: Tshoa-tshoam ga Me e, tc'ãa a x'ooan koe guu a ghùiea ba, nxãasegam gha w̄eé gúúan koe tc'ãa dis téé-q'oo sa úú ka. ¹⁹**Nqari ba** i ko qãè-tcaokagu, Gam tc'áróa gha cg'oèase **Krestem** koe x'ãe khama. ²⁰Gam dis xgàus di c'áðan koem kò guu a tòókuan kúrú, nxãasegam gha w̄eé zi gúú zi **Krestem** koe guu a xg'ae-xg'ae zi tòóku Gam koe, nqóómkg'ai koe hãna zi gúú zi h̄ee naka nqarikg'ai koe hãna zi h̄éth̄e e.

²¹C'èe x'aè ka tu kò Nqarim cgoa q'aara hãa tu khòe tu u, a tc'èe-kg'ámã tu koe Gam di tu cg'õo-kg'ao tu u, cg'ãe zi tséé zi kúrú tu kòo zi koe. ²²Igabam nc̄eska **Krestem** dis x'oos koe guu a Gam cgoa xg'ae-xg'ae tua, tu Gam koe tòókua, Gam ðim tc'áróm koe guu a^d, nxãasegam gha Gam cookg'ai koe tcom-tcomsa tu ii, a w̄eé za ga kãa chibi iise tòó tu u ka. ²³Igaba i ko qaase, tshoa-tshoases dtcòmã dis koe tu gha w̄eé x'aè ka qarika hãa sa, táá tu gha ntcãa-ntcãaè a qãe tchõàn di nqòðan koe tcg'òðe ka. Nc̄ee qãe tchõàn tu kómã hãa, nqarikg'ai ka nqãaka hãna hãa khòean w̄eé^e ko xgaa-xgaaè e, ra tí Paulo ra gaan ðir tséé-kg'ao ra a.

Paulom di tséa ne kerekes koe

²⁴Nc̄eskar ko ãer ko gatu domka xgàraè zi xgàraku-kg'ám zi ka qãè-tcao. Eè kò Krestem di xgàrakuan koe tcào sar ko tirim cgàam koe guu a cg'oè-cg'oe, Gam ðim tc'áróm domka, nc̄ee kereke sa ii ba. ²⁵Gas ðim tséé-kg'ao bar kúrú, Nqarim máa tea hãa tsééan khamaga ma, Nqarim

b 1:15 *Nqarim dis ii sam úúa* - Gerika sa ko máá: “Nqarim ðim ii Me e,” témé, igabas nc̄ee sa tchãno tãmas Naro si i. **c 1:15** *tc'amaka hãas téé-q'oo sa úúa hãa* - Gerika dis kg'ui sa ga Naros koe “tc'ãa a abãea ba” ta ma góá kabìe, igabas ko nc̄ees kg'ui sa mée a ko máá: “tc'amaka hãas téé-q'oo sa úúa hãa ba,” témé. **d 1:22** *Gam ðim tc'áróm koe guu a* - Gerika sa ko “tc'áróm cgàam ðim koe guu a” témé. **e 1:23** *nqarikg'ai ka nqãaka hãna hãa khòean w̄eé* - Gerika sa ko máá: “kúrúeas gúús w̄eés nqarikg'ai ka nqãaka hãna sa,” témé.

di kg'uia ner gha cg'oèa hāase máà tu u ka. ²⁶Kuri xu kuri xu, naka qhàò zi ko ma xùriku khama zi kò ncēe zi gúù zi chómmeà, igaba zi ncēeska Nqarim di ne khòè ne x'áfèa hāa. ²⁷Nqari ba kò x'ààkos qguùs chómsea zi gúù zi di sa q'āakagu ne kg'oana, ncēm ko tǎá zi qhàò zi di ne úúa máána hāa sa. Si kò **ncēes kàa sa**, Kreste ba gatu koe hāa si i, ncēe x'ààn di nqòòan ii ba. ²⁸Ncēe xae ko Gam ka xgae-xgae ba, a xae a ko wèém khòè ba tchàno-tchano, a wèém khòè ba wèè q'āan di tc'ēean ka xgae-xgae, nxāasega xae gha kúrú me wèém khòè ba Krestem koe wèè za ga kai ka. ²⁹Ncēes gúùs koer ko qarika tséé, a ko Gam di qarian koe guu a wèè qaria te tséékagu, ncēe ko tíí koe qarian cgoa tséé e.

2 ¹Q'āa méé tu sar ko tc'ēe, nta nooser ko gatu domka hēé, naka ēe Laodikea koe hàna ne hēé, naka wèè ne ēe tíí cgoa qanega xg'ae tama ne hēéthéé domka qarika tséé sa. ²Nxāasega i gha tcáóa ne ntcàmmè ka, ne ncàmkuan koe guu a cúís gúù sa kúrúè, nxāasega ne gha qguù a cg'oèa hāase kómá q'āa ka, chómsea zi gúù zi Nqarim di zi ne gha gane ka q'āa ka, ncēe Kreste ii zi, ³ncēe Gam koe i wèè qguùn q'āan di tc'ēean di hēé naka tc'ēegan hēéthéé di chómsea hāa ba.

⁴Ncēes gúù sar ko bìrí tu u, cúí khòè ga gha nxāasega tǎá kàa tu u ka, ncōè zi kg'ui zi ntcoekuan di zi ka igaba. ⁵Eētar ma tc'áróa te cgoa gatu koe káà ra a igabar tc'ēea te koe gatu cgoa hàna, a ra a ko qāè-tcao, gatu di tséé-kg'ámán hēé naka gatu di dtcòmán Krestem di koe qarika téé sa hēéthéer kò bòò khama.

Kreste ba ko cg'oèas kg'òè sa óága

⁶Ke nxāaska, ēe tu ma Jeso Kreste ba ma X'aigam iise sèèa hāa khamaga ma méé tu Gam koe kg'òè. ⁷Gam koe méé tu **hiis khama ma** tǒbega naka **nquum khama ma** tshàoa ghùìè; gataga méé tu dtcòmán koe qari-qariè, ēe tu ko ma xgae-xgaea khama, naka tua qāè-tcao-máákuan cgoa cg'oèa nqáése.

⁸Bòò méé tu, naka i cúí khòè ga tǎá khòèan di xgae-xgaan hēé, naka káà hùì qàe-qaekuan hēéthéé tséékagu naka qáé tu u guu. Khòèan di tc'ēe-kg'ámán hēé naka ncēm nqòóm di qarian hēéthéé ne ko xùri, a Kreste ba xùri tama. ⁹Nqari ba cg'oèa hāase Gam koe x'àèa hāa ke, Gam dim tc'áróm koe, ¹⁰tu Gam koe Gam di cg'oèa kg'òèan máàèa hāa, ncēe wèè qarian hēé naka wèè tc'āa-cookg'aian hēéthéé di Tcúú ii ba. ¹¹Gam koe tu kò gataga q'āe nqāa-qgai khòèa hāa, q'āe nqāa-qgai khòokus khòèan tshàu ka kúrúè tama sa, igaba Krestem ka kúrúèas q'āe nqāa-qgai khòokus koe tu guu a tc'áróm dim cgàam koe tcg'òòea. ¹²Krestem cgoa tu kò tcguù-tcguukus koe kg'ónòè, igaba tu kò Nqarim ncēe Kreste ba x'ooan koe ghùiam di qarian koe dtcòm, a gaas dtcòmms koe guu a **tcguù-tcguukus koe** Gam cgoa ghùìèa. ¹³Gatu di chìbian koe hēé naka gatu dim cgàam di q'āe nqāa-qgai khòèè taman hēéthéé koe tu kò x'óóa hāa, Me

kò Nqari ba Krestem cgoa kg'òèkagu tu u, a gatá di chìbian wèè ga qgóóa máá taa hãa, ¹⁴a kò ãe gatá di chìbian góáèas tcgãya sa tchùua tcg'òó, gaas di x'áè-kg'ámán cgoa, a ba a xgàus koe xgàu ana hãa. ¹⁵**Gaas xgàus** koem kò **Nqari ba tc'ëean di xu** tc'áà-cookg'ai xu qariga xu di ncõ-gàban xhùu cgae xu a qg'aè-cgaekagu xu, a ba a wèém khòèm cookg'ai koe sau-cgaekagu xu, a kò Tàà-kg'aom ii sa x'ái xu.

Krestem cgoa x'óó sa hëé naka Gam cgoa kg'òè sa hëéthëé e

¹⁶Gaa domka méé tu táá cúí khòè ga kgoara máá naka i xgàè-kg'am tu u guu ãe tu ko tc'òó a ko kg'áàs koe, dtcòm-kg'ao ne dis kòès dim cáím ka igaba, kàbam nxoem dis kòès ka igaba, Sabata dim cáím kaga igaba. ¹⁷Ncëea hààko zi gúú zi di sòm-c'ana a, igabagam tc'áró ba Krestem di me e. ¹⁸C'ëe khòèa ne hàna, cg'aré-cg'arese kg'oana a, a moengelean i gha dqòm sa ko qaa. Eë ne bóda hãa gúúan ka ne ko bóð-boose, a ne a ko gane dim cgàam di tc'ëean ka káà hùise tc'amaka bóðse. Táá méé ne téé-q'ooos ãe tu úúa sa sèè cgae tu u guu. ¹⁹**Tc'áróm dim** Tcúú ba ne qgóó tama. Wèém tc'áró ba ko Gaam Tcúúm koe guu a kai, a ba a q'amku-q'ooa ba hëé naka qg'áíá ba hëéthëé ka qari-qari a qgóóa xg'aeè, a ba a ko ãem ko ma Nqari ba tc'ëe khama ma kai. **Ke méé tu gane ka nqúu ka hãa.**

²⁰Krestem cgoa tu x'óóa hãa, a nqóóm di qarian koe kgoaraèa hãa. Dùús domka tua ko nxãaska ncëem nqóóm di tu iise kg'òèa máá, a gaam di x'áè-kg'ámán komsana, ncëe ko máá: ²¹“Táá tshàu cgoa qgóó guu! Táá xám guu! Táá cúú-cuuse guu!” ta ko méé e. ²²Ncëe **x'áè-kg'ámá nea** ko gúú zi ka kg'ui ncëe tséékaguè zi ko xg'ara ne gha kaà zi, x'áè-kg'ámán hëé naka xgaa-xgaan hëéthëéa khòèan koe guua. ²³Ncëe ne khòè ne ko nqárian qámseá máá, a ne a ko cg'aré-cg'arese, a gane di tc'áróan koe qgóósea hãa, khama i **ncëe x'áè-kg'ámán** q'áa di tc'ëean koe guua khama ii, igaba i qarian úú tama, cgàam ncàmá hãa sa i gha xgàè di i.

Kàbas kg'òè sa Krestem koe (3–4)

3 ¹Nxãakamaga tu kò Krestem cgoa ghùìèa hãa ne méé tu nxãaska gúú zi tc'amaka hàna zi koe tòón tcáó, ncëe Krestem hàna, a kg'áòm x'òàm Nqarim dim xòè koe ntcõe koe. ²Gúú zi tc'amaka hàna zi koe tu tc'ëea tu tòó, nqóómkg'ai di zi gúú zi ka tamase. ³X'óóa tu hãa, i gatu di kg'òèan Krestem cgoa Nqarim koe chómseá hãa ke. ⁴Ncëè Krestem, ncëe gatu dim kg'òèm kò x'áíse, ne tu gha gatu igaba thëé nxãaska Gam cgoa x'áàn koe x'áíse.

⁵Gúú zi ãe nqóómkg'ai di ii zi méé tu nxãaska x'ooan koe tcãà: cg'áràn hëé, cg'ãè cauan hëé, tshùú zi tc'ëe zi hëé, cg'ãè tc'ëean hëé, naka cëan

hēéthēé e, ncēe kúrúa mááseèa hāa nqárian qámseá máá di i. ⁶Ncēe gúúan domka i ko Nqarim di xgòàn ēe komsana Me tama ne koe hàà ke. ⁷C'ēe x'aè ka tu kò gazi gúù zi ka tc'āà-cookg'aiè, a gazi koe kg'òè. ⁸Igaba méé tu ncēeska gatu igaba wèé gúúan ncēeta ii aagu: xgòàn hēé, c'lee-c'eean hēé, cg'āè tc'ēean hēé, còèkuan hēé, saucgaekaguko kg'uian hēéthēé e; gúúan ncēe wèé méé tu kg'ámá tu koe táá tcg'òó guu. ⁹Táá tshúù-ntcòá-mááku guu, gatu dim tc'áróm ncii ba tu nxòoa tcg'òó hāa, gam di zi tséé-kg'ám zi cgoa ke, ¹⁰a tu a kabam **tc'áró** ba hāna hāa, nxāasega tu gha kabá-kabaè, a gatu ka q'āa Me, a bòdse-q'ooan Gaam ēe Kúrú-kg'aom ii di x'áíá hāa ka. ¹¹Gerikan hēé naka Jutan hēéthēé **di q'aa-q'ooa** nea Gam koe hāa tite, q'āe nqāa-qgai khòèa ne hēé kana q'āe nqāa-qgai khòèe tama ne hēé, c'ēe zi qhàò zi di ne hēé, nqúù ka x'āèa khòèan' hēé, qāàn hēé naka qāà taman hēéthēé e, igabam Kreste ba wèé Me e, a ba a wèéan koe ga hàna.

¹²Gaa domka, Nqarim nxará tcg'òóa máásea hāa tu khòè tuè, tcom-tcomsa naka ncām-ncamsa tu, hāakaguse tu thòò-xama-máákua ne, qāèan hēé, naka cg'aré-cg'aresean hēé, naka kgàesase qgóósean hēé naka qád tcáóan hēéthēé cgoa. ¹³Gatu ka c'ēe ne cgoa méé tu tsééa xg'ae, naka ncēè c'ēe khòèan cgoa tu kò c'ēes guu sa úúá hāa ne méé tu qgóóa mááku. Eēm ma Nqari ba ma qgóóa máá tua khamaga ma méé tu gatu igaba gatà ma kúrú. ¹⁴Wèé zi gúù zi ncēe zi tc'amkg'ai koe méé tu ncāmkuan hāa, ncēe ko wèé zi gúù zi cg'òèase qáéa xg'ae e.

¹⁵Krestem di tòókuan méé i tcáóa tu tc'āà-cookg'ai, ncēe tu ma cúúm tc'áróm di ii, a tòókuan koe tciièa khama. Ke tu qāè-tcaoa máá **Me**. ¹⁶Krestem dim kg'ui ba méém gatu koe qguùase x'āè. Xgaa-xgaaku tu naka tchàno-tchanoku wèé tc'ēean cgoa, naka tua Pesaleman hēé, naka ciian hēé, naka tc'ēean di ciian hēéthēé tcáóa tu q'oo koe qāè-tcaoa-máákuan cgoa Nqari ba nxāèa máá. ¹⁷Naka dùús wèés ēe tu ko kúrú sa, kg'uian koe ga igaba kana tsééan koe ga igaba, méé tu wèéa sa ga X'aigam Jesom dim cg'òèem koe kúrú, naka tua Gam koe guu na Nqarim Xòò ba qāè-tcaoa máá.

Khòè zi hēé naka khòè xu hēéthēé e

¹⁸Khòè saoè, gasao di xu khòè xu sao máàse, ncēe i ma X'aigam koe ma kg'anoa hāa khama.

¹⁹Khòè xaoè, gaxao di zi khòè zi xao ncām naka xaoa táá thòò-xamkagu zi guu.

Cóán hēé naka xòò ga ne hēéthēé e

²⁰Cóá tuè, gatu ka xòò ga ne wèé zi gúù zi koe komsana, nxāa sa ko X'aiga ba qāè-tcaokagu ke.

f 3:11 *nqúù ka x'āèa khòèan* - Gerika sa ko "Sekithia" témé.

²¹Cóán ka xǒò ga xaoè, táá cóán xgàè guu, naka i nxāasega táá tshùu-tcao guu.

Qǎàn hēé naka x'aigan hēéthéé e

²²Qǎà tuè, gatu ka q'òðse ga ne nqǒóm di ne tu komsana wèé zi gúú zi koe. Ncēe gúúan méé tu kúrú, gaan di tcgáían gatu koe tòóa hāas ka tamase, kana cgómkuan tu gha hòò cgae e domka tamase, igaba méé tu wèé tcáóa tu cgoa kúrú u, X'aiga ba q'áòa hāase. ²³Dùús wèés ēe tu ko kúrú sa méé tu wèé tcáóa tu cgoa tséé, X'aiga ba ko tsééa máá khama, khòem ka tamase. ²⁴X'aiga ba gha ēem Gam di ne khòè ne tòóa máána hāa sa kǎbi máákus iise máà tu u sa tu q'ana hāa khama. X'aigam Kreste Me e ncēe tu ko tsééa máá ba khama. ²⁵Wèém khòem ēe ko cg'ǎèan kúrú ba gha suruta kǎbiè gam di cg'ǎèan domka, **Nqari ba** khòèan tǎákase qgóó tama **khama**.

4 ¹X'aiga xaoè, gaxao di qǎàn méé xao ēe tchàno ii a qǎè ii sa máá, gaxao igaba xao q'ana hāa, X'aiga ba xao nqarikg'ai koe úúa hāa sa ke.

C'ēe x'ǎè-kg'áma ne

²Gatu di còrèan tu qarika qgóó, naka gaan koe kòrese hāa, naka **Nqari ba** qǎè-tcao máá. ³Naka tu gataga còrèa máá xae e, nakam gha nxāasega Nqari ba gaxae di kg'uian nquu-kg'áman xgobekg'ama máá, naka xae Krestem ka chómse tseeguan nxàe, ncēer gaan domka qáéèa a. ⁴**Còrè** nakar nxāasega tchànose nxàea tcg'òó o, ncēe i ko ma qaase khama. ⁵Eē tchàa koe hàna ne méé tu tc'ēegase tséé cgoa, wèém x'ǎè ba cg'òèase tséékagu na. ⁶Gatu di kg'uian méé i wèé x'ǎè ka cgómkuan ka cg'òèa hāa, tǎbean cgoa tsǎubeèa hāase, nxāasega tu gha q'ǎa, ntama tu gha ma wèém khòè ba xǒa sa ka.

Còo di zi tsgámkaguku zi

⁷Wèé tchòà nem gha Tigiko ba tíi ka bìrí tu u, ncàm-ncamsam qōe ba, a tcom-tcomsam tséé-kg'ao ba, a gaxae khama ma qǎà ba X'aigam koe. ⁸Gaa domkar ko gatu koe tsééa úú me, ntama xae ma hāa sa tu gha nxāasega q'ǎa ka, me gha gataga gatu di tcáóan ghùì-ghui. ⁹Onesimom cgoam ko síi, tcom-tcomsa, a ncàm-ncamsam qōe ba, ncēe gatu ka c'ēe ba. Wèé zi gúú zi ncēe koe ko kúrúse zi ka tsara gha bìrí tu u.

¹⁰Tíi khama qáéèàm Arisetareko ba ko tsgámkagu tu u, me ko Marekom Barenabasem ka qōese ba théé tsgámkagu tu u (nxāakamaga tu x'ǎè-kg'áman hòò, ncēè hààm kò ne méé tu qǎèse hàakagu me di i).

¹¹Jesom, ncēe ko Jusetò ta ma tcièè ba, nxāam igabam ko **tsgámkagu tu u**. Nooa xu Jutax xu xu u ncēe ko Nqarim di x'aian koe tíi cgoa tsééa

g 4:11 Jutax - Gerika sa ko máá: “q'ǎe nqāa-qgai khòèa xu,” témé.

xg'ae xu, a gataga tí koe kaisa hùikuan úúa hãa xu. ¹²Epaferasem nc̄ee gatu ka c'ēe ba, a Jeso Krestem dim qãa ba ko tsgámkagu tu u. Wèè x'aè kam ko qarika còrèa máá tu u, wèéan ēem ko Nqari ba tc'ēe koe tu gha qarika téé, a gha **dtcòmà tu koe** kaia hãa, a wèè tcáóa tu cgoa Gam koe dtcòm ka. ¹³Kaisa tsééan ēem ko gatu hēé naka Laodikea di ne hēé naka Hierapolise di ne koe hēéthēé tcãa tcáó a kúrú koe ra ko gam ka nxàea tseegukagu. ¹⁴Ncàm-ncamsam Lukam naaka di ba hēé, nakam Demase ba hēéthēé tsara ko tsgámkagu tu u.

¹⁵Tíí qōe ga ne Laodikea koe hàna ne méé tu tsgámkagu, naka Nimefase sa hēé naka kerekes gas dim nquum koe ko **xg'aes** ga sa hēéthēé e.

¹⁶Ncēes tcgāya sa tu ko nxará máàèa xg'ara ne méé tu kúrú nakas gataga thēé kerekes Laodikea di sa nxará máàè si. Naka tu gatu tcgāyas Laodikea koe guua sa nxará.

¹⁷Naka gataga Arekipo ba bìrí naka máá: “Q'ōé méé tsi naka ēe tsi ko X'aigam koe máàèa tsééan xg'ara-xg'ara,” témé.

¹⁸Tíí Paulo ra ko nc̄ee tsgámkagukuan tshàua te cgoa góá máá tu u. Tiri táuan tu tc'ēe-tc'ēese. Cgómkuan méé i gatu cgoa hãa.